

# Tgi sesa sper ils magnats impurtants?

Il nov urden da seser en la chombra gronda

DA CLAUDIA CADRUVI / ANR

■ **Il plaz da seser tradescha la posiziun en l'atgna fracziun. Magdalena Martullo-Blocher e Martin Candinas han ils plazzs pli attractivs dals cussegliers naziunals grischuns.** Igl è in pau sco pli baud en scola. Sper quel che dat en il tun less mintgin seser – era sch'el ha in pau ina bucca largia. E tgi che dastga prender plaz sper la pli bella ha automaticamain il respect da tschels. Stuair seser en l'emprima retscha munta in struffetg. Bler pli gugent stattan ins en il baun davostiers tar ils cools.

En il cussegl naziunal èsi strusch aufer. En l'ultima retscha sesan ils magnats d'ina partida. Ils novizs u quels che han da dir pauc ston sa cuntentar cun las sugtas davantiers. L'anr ha observà nua che las fracziuns han piazzà ils parlamentararis grischuns?

## Sper schefs e scheffas

*Martin Candinas* para d'esser arrivà en las autezzas. En questa legislatura ha el survegni in dals plazzs desiderads en la davosa retscha tar ils schefs e las scheffas da fracziun. En l'ultima sessiun aveva anc il president da la pcd *Christoph Darbellay* occupà ina da questas sugtas. Uss n'è Darbellay betg pli en il parlament e prest era betg pli a la testa da la partida. Co dastgan ins interpretar la midada da plaz da Candinas? Sco avanzament? Sa sch'el tutga tar ils aspirants per il presidi? U sesa el simplamain en l'ultima retscha per esser pli datiers da la porta per pudair mitschar pli svelten en la Wandelhalle?

Candinas sez di: «La vicepresidente da fracziun *Viola Amherd* m'ha dumandà sch'jau veglia seser sper ella. Sin questa scharmanta purschida n'hai jau betg pudì dir na.» *Marco Romano* sesa da l'auter



Immediat ha la pps concedì a la nova cussegliera naziunala Magdalena Martullo-Blocher in dals megliers plazzs en la fracziun. KEYSTONE

maun da Candinas. Els èn omadus da la medema posa e possedan entras lur vegliadetgna in pulit potenzial da far carriera. Sa sch'ìls dus vischins vegnan in di ad esser concurrents sch'ì va per in impurtant post da partida u da fracziun?

## Sper Aeschi e Hurter

*Magdalena Martullo-Blocher* n'ha betg stuì spetgar in'entira legislatura per survegnir ina sugta attractiva. La fracziun ha immediat tschentà ella en la segundavosa retscha. Sche *Martullo* vul discurren cun il president da partida u cun il president da fracziun sto ella mo vol-

ver il chau: Gist davos ella sesan *Toni Brunner* ed *Adrian Amstutz*.

E sper *Martullo* sesan gist dus candidats cun schanzas excellentas per davenar cusseglier federal: Da maun sanester èsi il favorit blocherian *Thomas Aeschi* e da maun dretg *Thomas Hurter*. El na sa chatta betg sin il ticket uffizial da la pps – tant pli attractiv daventa el per l'ala sanestra sco candidat selvadi.

## Amez il marighel da schurnalists

El haja giavischà da pudair salvar ses plaz, di *Heinz Brand* che sesa sco en la

davosa legislatura en la terzdavosa retscha. «En quest lieu han ins la megra survista sin l'entira sala», di *Brand*. En la retscha dals schefs e presidents regia adina ina canera ed in currim. Là nua ch'el sesia haja el dapli ruaus.

In auter avantatg è tenor *Brand* ch'el po gist anc trenar da discurren franzos e talian cun ses vischins. Da maun dretg sesan *Marco Chiesa* dal Tessin, suenter vegn *Jacques Nicolet* dal Vad e *Céline Amaudruz* da Geneva. Da maun sanester sesa il schurnalista *Peter Keller* che scriva per la «Weltwoche». Insumma sesa *Brand* amez in marighel da schurnalists. Gist davent

el ha il schefredactor da la «Weltwoche» *Roger Köppel* ses plaz.

## Sin exact la medema sugta

«Nus pudain giavischar nua che nus vulain seser», di *Silva Semadeni*. I dettia da quels che chattian impurtantissim tge plaz ch'els survegnian. Ella sezza na saja betg da quest avis e n'haja inoltrà nagin giavisch. La fracziun socialdemocrata ha piazzà *Semadeni* sin la sugta 103. Igl è la medema sco en l'ultima legislatura. Da maun sanester sesa il president da vischnanca da Rümlang *Thomas Hardegger* e da l'autra vart il sindacalista *Philipp Hadorn* dal chantun Soloturn. E sche *Semadeni* sa volva po ella discurren cun l'anterior diplomat *Tim Guldemann*.

Insumma è *Semadeni* constanta tge che pertutga sia sugta. Gia il 1995 fin il 1999 è *Semadeni* sesida quasi en il medem lieu, numnadamain sin la sugta 102.

## Dretg e sanester dal zuler

Ils vischins da *Duri Campell* èn la verdliberala *Isabelle Chevalley* ed il collega da partida *Bernhard Gull* dal chantun Son Gagl. Las set sugtas da la pbd èn spartitschadas sin trais retschas e spartidas entras in corridor. La pitschna partida è tschinclada da la pps, pld, pcd, pvl e dals verds. Quai po esser in avantatg: Ils cussegliers da la pbd han uschia contact direct cun las autras partidas e la chaschun per vivas discussions.

Da l'autra vart n'èsi strusch pussaivel da manar in discurs discret entaifer la fracziun. *Campell* è il politicher grischun che sesa il pli davant en il parlament. Tuttina hai anc ina u l'autra personalitad prominenta en sia vischinanza, per exempel il verd *Bastien Girod* u directamain davos el sia scheffa da fracziun *Rosmarie Quadranti* ed il president da partida *Martin Landolt*.